



Inatsisartunut ilaasortaq Aqqaluaq Egede  
Inuit Ataqaatigiit

## Aluminiumik aatsitsiviliortoqarnissaanut atatillugu akileraartarnermut tungasunik Naalakkersuisunut apeqqutit.

Matuma ataaniittunik, Inatsisartut Suleriaasianni § 36, imm. 1 naapertorlugu, Naalakkersuisunut apeqqutit matumuuna akissuteqarfigissavakka. Apeqqutit 11. marts 2008-mi tiguneqarput.

Aallaqqaatigalugu oqaatigineqassaaq, Inatsisartut upernaami maannakkut ataatsimiinnerminni aluminiumik aatsitsiviliorsinnaanissap inissinneqarnissaa pillugu arlaqartutigit aammalu piginnittuunermut ilusiliinissaaq pillugu tunngaviusunik aalajangiisussammata taamaattumillu arlaqartutigit naatsorsuinerugallartut taamaallaat maannakkumut suliarineqarsimallutik. Taamaammat erseqqissaatigineqassaaq, matuma ataani akissuteqaatit allatut ajornartumik naatsorsuinerugallartut tunngavialugit suliaammata.

13. marts 2008  
J.nr.

Postboks 1037  
3900 Nuuk  
Oq/tel +299 34 50 00  
Fax +299 32 46 14  
oed@gh.gl  
www.nanoq.gl

### 1. Maniitsup eqqaani aluminiumik aatsitsiviliortoqassappat sanaartorerata nalaani sulisut amerlaqisut aningaasarsiaasa akileraarutitassai sumut tuttassappat qanorlu aaqqissuunneqarniarpat?

Naalakkersuisut naatsorsuutigaat sanaartorerup nalaani, 2010-miit 2014-ip tungaanut, inuit 2000-it 5.500-llu akornanni sulisorineqassasut soorlu Kalaallit Nunaanni aluminiumik aatsitsiviliornissaaq pillugu aalajangiinissamat tunngavissani qupperneq 9-mi oqaatigineqartut. Taakkunannga amerlanerpaat sulisut nunanit allanit tikisitaanissaat ilimagineqarpoq

Sanaartorerup nalaani 2010-miit 2014-ip tungaanut sulisunit tikisitanit akileraarutit katillugit 1.3 mia. koruunit missaannut maannamuugallartoq naatsorsorneqarallarsimapput. Soorlu Naalakkersuisut aningaasaqarnikkut ingerlatsineq pillugu 2008-mut nalunaarutaanni oqaatigineqartut, suliffeqarfiit piffissani sivikitsuni illoqarfiit nunaqarfiillu avataanni pilersinneqartut kommunit aningaasaqarnerannut nanertuutaassanngillat, taamaammallu siunnersuutigineqarluni suliani illoqarfinni piusuni inuiaqatigiinnut atasuunngitsuni ingerlatsiviusuni nunanit allaneersunit sulisunit akileraarutitigit isertitat nunap karsianut nakkartassasut.

Kalaallinit/Kalaallit Nunaanni angerlarsimaffeqartunit akissarsianit akileraarutit isertitat, akissarsiaqartuusup kommunianut, ataatsimoortumik kommuninut nuna-mullu tamarmut akileraarutit maannamutut agguanneqartassapput.

### 2. Aamma minnerunngitsumik aatsitsiviliorfissatut suliffeqarfissap pilersinneqarnissaa aningaasanik amerlasuunik nunatsinnut sunniuteqassaaq. Pilersaarut uniorlugu ajutoortoqassappat aningaasatigit annaasaqarsinnaaneq qanoq sillimmartaarfigineqarpat?

Piffissami matumani akissuteqarfigisami piginnittuunerup qanoq iluseqarnissaa aalajangiiffiqeqarsimanngimmat, apeqqut tamakiisumik akissallugu ajornarpoq, innersuussineqaannarsinnaallunili Kalaallit Nunaanni aluminiumik aatsitsiviliorinissaq pillugu aalajangiinissamut tunngavissaasunut.

Ukiuni aggersuni misissueqqinnerit, ilimagisamut akerliusumik aningaasaliissuteqarnerit akilersinnaassannginnerannik takutitsissappata, soorunami aluminiumik aatsitsivilioritoqassanngilaq.

### **3. Suliffeqarfissuup akileraarutissai qanoq annertutigiumaarnersut missingersoneqarnikuuppat taakkulu qanoq annertutigissappat?**

Aluminiumik aatsitsivimmit atuutlerfissaatut ilimagineqarfiata kingornatigut, sanaartornermi annertuumik aningaasaliissuteqarnerup kingunerisaanik tamatumani aamma akileraartarnermi annertuumik nalikilliliinissap nassatarisaanik, ukiuni tulluuttuni siullerni amerlasuuni suliffeqarfissuup akileraarutaanit isertitassanik missingersuusiortoqanngilaq.

Tassunga atatillugu erseqqissaatigineqassaaq pilersaarutip piviusunngortinneqarnissaa aalajangiutivinneqartinnagu inummut imaluunniit selskabinut akileraarutinit isertitaqarnerunissaq missingersuutitut ilanngunneqassanngimmata.

### **4. Aatsitsiviup nioqqutissiulernerani suliffeqarfissuup aamma sulisorisat akileraarutissaat sumut nakkartinneqartassappat?**

Sanaartornerup nalaani pissutsit illua tungerisaanik ingerlatsinermi sulisut amerlanersaat Kalaallit Nunaanni najugaqartuunissaat (sumiiffimmi inuiaqatigiinnut annertunerusumik atasuunissaat) ilimagineqarpoq taamaattumillu akileraarutitigut isertitat sulisut kommuniinut, kommuninut ataatsimut akileraarummut nunamullu tamarmut akileraarummut agguanneqassallutik.

Taamaasilluni sanaartornerup nalaani pissutsit illua tungerisaanik sulisut annertunerugaartumik kommunit sullissinerinik atuisuussallutik, assersuutigalugu ineqarniarnikkut, atuarfeqarnikkut, meeqqeriveqarnikkut assigisaasigullu taamaammallu soorunami kommunip sullissinerit tamakkua ingerlassinnaanissaannut isertitat ilaat pisassarissallugit.

Inussiarnersumik inuulluaqqusillunga

Aleqa Hammond